

**ZAKON**

***O UPOTREBI I ZAŠTITI NAZIVA BOSNE I HERCEGOVINE***

### ***Član 1.***

Ovim zakonom uređuju se uslovi i način upotrebe i zaštite naziva Bosne i Hercegovine.

### ***Član 2.***

Svi oblici institucija (javnih, kulturnih i drugih), udruženja građana i drugih pravnih lica imaju pravo na upotrebu naziva Bosne i Hercegovine pod sljedećim uslovima:

1. da svojim statutom i osnivačkim aktom utvrđuju da će djelovati, odnosno vršiti svoje aktivnosti na teritoriji cijele Bosne i Hercegovine ili da se područje njihove djelatnosti, odnosno aktivnosti odnosi na teritoriju cijele Bosne i Hercegovine,
2. da unošenje naziva Bosne i Hercegovine u ime odnosne institucije, udruženja ili pravnog lica, nije u suprotnosti s interesima unutrašnjeg i međunarodnog javnog poretka.

### ***Član 3.***

Za upotrebu naziva Bosne i Hercegovine potrebno je odobrenje.

### ***Član 4.***

Zahtjev za upotrebu naziva Bosne i Hercegovine mogu podnijeti institucije, udruženja građana i druga pravna lica koja žele u svoj naziv unijeti naziv Bosne i Hercegovine.

Zahtjev za upotrebu naziva Bosne i Hercegovine podnosi se Ministarstvu civilnih poslova i komunikacija (u daljem tekstu: Ministarstvo).

### ***Član 5.***

Zahtjev za izdavanje odobrenja za upotrebu naziva Bosne i Hercegovine obavezno sadrži: naziv podnosioca zahtjeva, naziv koji se predlaže, osnivački akt (s opisom djelatnosti i područjem djelovanja) i druge značajne podatke, s obrazloženjem.

### ***Član 6.***

Odobrenje za upotrebu naziva Bosne i Hercegovine daje Vijeće ministara Bosne i Hercegovine, na prijedlog Ministarstva.

Protiv rješenja kojim se odbija zahtjev za upotrebu naziva Bosne i Hercegovine ne može se izjaviti žalba.

### ***Član 7.***

Izuzetno, nazivom Bosne i Hercegovine mogu se nazivati i dijelovi grada, odnosno općina, ulice, trgovi i slično.

Odobrenje za upotrebu naziva Bosne i Hercegovine iz prethodnog stava, a pod uslovima iz člana 2. tačka 2. ovog zakona, daje Vijeće ministara Bosne i Hercegovine shodno odredbama čl. 4. do 6. ovog zakona.

### ***Član 8.***

Niko ne smije upotrebljavati naziv Bosne i Hercegovine ako mu to po odredbama ovog zakona nije izričito dozvoljeno.

#### *Član 9.*

Upotreba naziva Bosne i Hercegovine, koja nije u skladu s ovim zakonom, kažnjiva je.

Kažnjivost iz prethodnog stava ovog zakona entiteti i Brčko Distrikt Bosne i Hercegovine uredit će odgovarajućim propisima u roku od dva mjeseca od dana stupanja na snagu ovog zakona, s tim da će se učionicu tog kažnjivog djela obavezno izricati i zaštitna mjera zabrane dalje upotrebe naziva Bosne i Hercegovine.

#### *Član 10.*

U roku od šest mjeseci po stupanju ovog zakona na snagu sve institucije, udruženja građana i druga pravna lica, čiji naziv sadrži i naziv Bosne i Hercegovine, moraju svoje nazive uskladiti s odredbama ovog zakona.

#### *Član 11.*

Odredbe ovog zakona ne odnose se na državne organe vlasti Bosne i Hercegovine i druge institucije i pravna lica koja su osnovana zakonom ili drugim aktom Parlamentarne skupštine Bosne i Hercegovine, Predsjedništva Bosne i Hercegovine ili Vijeća ministara Bosne i Hercegovine.

#### *Član 12.*

Ovaj zakon stupa na snagu osmog dana od dana objavljivanja u "Službenom glasniku BiH", a objavit će se u službenim glasilima entiteta i Brčko Distrikta Bosne i Hercegovine.